

Asina aki tambe e **Tabernakel** di den e **Lei** i e **Profetanan** ta **testiguá i revelá Kristu Hesus**. E **Hudiunan, Hebreonan** tabata yama e tres paseonan di e **Tabernakel**; e **Kaminda**, i e **Bèrdat**, i e **Bida**. Ta pa e motibu aki **Kristu Hesus** a bisa: "**Ami** ta e **Kaminda**, i e **Bèrdat**, i e **Bida**; ni un hende no ta bin serka e **Tata**, sino pa medio di **Ami** (**Juan 14:6**).

Kristu Hesus a muri na **Krus** pa nos **pikánan**, anto e **Krus** aki tabata presente for di den e **Lei**. **Dios Tata** a duna Moisés tur e datonan kon pa traha e **Tabernakel**, anto ora **Dios Tata** tabata wak for di shelu e tabata mira e **Krus** aki ku e **Tabernakel** den e sentro, pasobra na kada banda di e **Tabernakel SEÑOR** a duna òrdu pa kampa rònt di e **Tènt di Reunion**, na un distansia (**Numbernan 2:2**). Dor di **Obediènsia** na **Dios Tata**, e **Tabernakel** huntu ku e 13 tribunan mira for di shelu tabata tin ku forma un **Krus**.

- Na parti **ost** di e **Tabernakel** tabata tin 3 tribu. E promé **tribu Juda**, e di dos **tribu Isakar**, e di tres **tribu Zabulon**. Total di hòmbènan kontá pa parti **ost di e Tabernakel** tabata **186.400** (**Numbernan 2:3-9**).
- Na parti **sùit** di e **Tabernakel** tabata tin 3 tribu. E promé **tribu Ruben**, e di dos **tribu Simeon**, e di tres **tribu Gad**. Total di hòmbènan kontá pa parti **sùit di e Tabernakel** tabata **151.450** (**Numbernan 2:10-16**).
- Na parti **wèst** di e **Tabernakel** tabata tin 3 tribu. E promé **tribu Efrain**, e di dos **tribu Manasés**, e di tres **tribu Benjamin**. Total di hòmbènan kontá pa parti **wèst di e Tabernakel** tabata **108.100** (**Numbernan 2:18-24**).
- Na parti **nort** di e **Tabernakel** tabata tin 3 tribu. E promé **tribu Dan**, e di dos **tribu Aser**, e di tres **tribu Nèftalí**. Total di hòmbènan kontá pa **nort di e Tabernakel** tabata **157.600** (**Numbernan 2:25-31**).

E di 13 tribu tabata e **tribu di Leví**. E **Levitanan** tabata tin ku traha den e **Tabernakel**, den e sentro nan mester tabata. E **tribu di Leví** tabata rondó di e **Tabernakel** na parti **wèst** (**3:23**), **sùit** (**3:29**), **nort** (**3:35**) i **ost** (**3:38**) entre e **Tabernakel** i e sobra 12 tribunan (**Numbernan 3**).

E **Krus** mira for di den shelu tabata wòrdu forma dor di e kamentu di e **13 tribunan** segun e **ordenansanan** di **Dios Tata** rondó di e **Tabernakel**. Awor, si **Perfekshon** tabata bin dor di e saserdosio **Levítiko**, pasobra a base di esaki e pueblo a risibí e **Lei**, ki nesesidat mas tabatin pa un otro saserdote lanta segun e òrdu di Melkisedek, i no yamá segun e òrdu di Aaron? (**Hebreonan 7:11**).

I **El** a bisa nan: "Esaki nan ta **Mi palabranan** ku **Mi** a papia ku boso miéntras ku **Mi** tabata serka boso ainda, ku tur kos ku ta pará skirbí tokante di **Mi** den e **Lei** di Moisés i e **Profetanan** i e **Salmonan** mester wòrdu kumplí." (**Lukas 24:44**). **Kristu Hesus** a muri na **Krus** ku tabata un símbolo for di den e **Lei**: "Asina ta pará skirbí, ku e **Kristu** mester a sufri i lanta for di e mortonan riba e di tres dia, i ku **Repentimentu** pa **Pordon** di **piká** mester a wòrdu **Proklamá** den **Su nòmber** na tur nashon, kuminsando na **Herusalèm** (**Lukas 24:46-47**).

I e **Palabra** a bira karni i a biba meimei di nos; **Tabernakel** meimei di nos, i nos a mira **Su Gloria**, **Gloria** manera di e **úniko Yu**, yen di **Bondat** i **Fieldat**; yen di **Grasia** i **Bèrdat** di e **Tata** (**Juan 1:14**). **Kristu Hesus** ta nos **Gran Saserdote** i nos **Tabernakel Spiritual** (**Hebreonan 9:11-14**). Kada parti di e **Tabernakel** di den e **Lei** ta **siña** nos **lèsnan Spiritual** kon pa aserka **Dios Tata**. Ta pa e motibu aki **Kristu Hesus** a bisa: "**Ami** ta e **Kaminda**, i e **Bèrdat**, i e **Bida**; ni un hende no ta bin serka e **Tata**, sino pa medio di **Ami** (**Juan 14:6**).

17 novèmber 2017

Sea Bendishoná den e Amor di Yeshua Mesias

Rev. Remsly L Riley